

# L'Ospidal Engiadina Bassa es ün dals meglers in Svizra

La qualità, la sgürezza e la trasparenza persvadan danövmaing

DA MARTINA FONTANA / ANR

■ Fingì avant duos ons ha l'Ospidal Engiadina Bassa a Scuol survgnü fich bunas notas dad experts chi han tut suot la marella la qualità e la sgürezza dad ospidals in tuot la Svizra. Uossa han ils respunsabels da l'ospidal danövmaing survgnü las megltras notas. Il tema da la sgürezza da paziants, sgürar la qualità da l'ospidal e la pretaisa dad avair ospidals chi nun han temma da muosar trasparenza es actual e pissera adüna darcheu in tuot la Svizra per discussiuns animadas. Sco ün da totalmaing be 15 ospidals in Svizra ha l'Ospidal Engiadina Bassa a Scuol in mans ün documaint chi certifichescha lur bun stadi raggiunt in tuot las dumondas surnomnadas. Fingì da l'on 2006 han ils respunsabels da l'ospidal da Scuol pudü tour incunter quella certificaziun: Cun 27 da maximalmaing 28 puncts han els persvas ils experts in chosa plainamaing. In november da l'on passà han ils perits danövmaing tut suot la marella las pretaisas chi stögljan gnir accumuladas in ün ospidal – e danövmaing ha quel da Scuol per uschè dir survgnü la medaglia d'or.

## «Las fadias fattas sun gnüdas accumuladas a cuntantezza da tuots»

Il directur da l'Ospidal Engiadina Bassa, Joachim Koppenberg, es cuntainti-schem: «Per mai es il resultat raggiunt danövmaing la conferma dad avair incha-




Dürant quista primavaira publichescha il magazin GEO da Hamburg üna documentaziun a regard il tema «sgürezza dal paziaint» chi'd es gnüda retscherschada aint il Ospidal Engiadina Bassa a Scuol.

FOTOS M. FONTANA

minà la dretta via», declera'l. Cha cun avair surgnü eir quista vouta fich buns resultats nu saja uossa però dat il tun da partenza per nu far plü nöglia. «Eir schanus vain raggiunt quel bel resultat stuvaina adüna darcheu provar d'ameglrar la

situaziun o almain da pisserar cha quella resta sül bun livel», accentuescha'l. Chi fetscha però bain da gnir a savair cha tant las investiziuns fattas in munaida sco eir l'ingaschamaint da tuot il personal e da las personas a la testa da



Joachim Koppenberg, directur da l'Ospidal Engiadina Bassa, po esser cuntaint: «Seis» ospidal es ün dals meglers valutats in Svizra.

l'ospidal hajan manà buns früts. «Al cumainzamaint da l'intent da s-chaffir per nos ospidal ün concept da qualità nu d'eiran tuots persvas dal success», conceda'l ed agiundscha chi nu saja stat simpel da persvader ils adversaris.

## Ün concept chi dà sgürezza a personal e paziaint

Ün exaimpel da las bleras masüras da qualità da l'Ospidal d'Engiadina Bassa es il concept da la terapia dal mal. «Ils meidis ed il personal da chüra eruischan in scrit per mincha paziaint üna terapia da mal chi's cunfà cun seis bsögn», declera Koppenberg. Cha quella masüra survegna grond lod dals paziants. «Il paziaint sa che medicamaints ch'el survain e mincha persuna chi ha dachefar cun quel paziaint sa dürant tuot la terapia che ch'el sto far – perquai cha la terapia es scritta avant. Cun na stuvair ir a dumandar al meidi che chi's po dar al paziaint cunter il mal as spargna bler temp ed il paziaint patischa damain», cuntinua'l. Il concept da la terapia dal mal dà tenor seis maniamaint sgürezza al paziaint ed al personal chi til chüra. La sgürezza dal paziaint vain tanter oter sgürada cun uschedittas «listas da check» ingio cha detagls a regard il paziaint e si'operaziun sun visiblas per tuots. «La trasparenza da la gestiun da l'ospidal es evidainta», intuna Koppenberg, «tant la populaziun sco eir tuot las instanzas pli otas fin pro l'Uffizi federal per la sandà vegnan infuormats regularmaing dals resultats raggiunts in nossa gestiun», suottastricha'l e conclüda cha la sincerità e la trasparenza sajan factuors fich importants per manar ün ospidal al success.

La publicaziun da las examinaziuns fattas sun tanter oter eir publichadas sün la pagina [www.cseb.ch](http://www.cseb.ch)